



*Bosniakiska Islamiska Samfundet
Islamska zajednica Bošnjaka u Švedskoj*

B i l t e n

Informativno glasilo Islamske zajednice Bošnjaka u Švedskoj

Broj 2 - April 2014 Džumade-l-uhra/Redžeb 1435




IZ ŠVEDSKE NA HADŽDŽ SA IZBUŠ - o m

Prijava za odlazak
na hadždž iz Švedske
do 15.05.2014.god.

1. MART
moj glas, moja zemlja

*Vjerujemo u ono što govorimo,
radimo ono u što vjerujemo.*

www.prvimart.ba | fb.com/prvimart.ba | twitter.com/prvimart




Islamska zajednica Bošnjaka u Švedskoj

Adresa: Slättervägen 44, 461 61 Trollhättan;
Tel. 076 310 24 47 / 0520-499064

www.izb.se

Potražite nas i na facebook-u
Islamska zajednica Bošnjaka u
Švedskoj



Bilten

*Informativno glasilo
Islamske zajednice Bošnjaka u
Švedskoj*

GLAVNI UREDNIK

Idriz-ef. Karaman

Glavni imam

IZVRŠNI UREDNIK

Almedin-ef. Spahić

REDAKCIJA:

Savjet glavnog imama:

Nezir-ef. Špiodić

Smajo-ef. Šahat

Elvedin-ef. Bešlija

SARADNICI U OVOM BROJU:

Jasmin Dervišević, Trollhättan

Mensur Mustafić, Norkköping

Nermin-ef. Babić, Danska

UVODNIK ZA DRUGI BROJ BILTENA IZBUŠ

Kao što je poznato, ovih dana je Sabor Islamske zajednice u Bosni i Hercegovini usvojio amandmane na postojeći Ustav Islamske zajednice u Bosni i Hercegovini. Suštinu usvojenih amandmana najbolje pojašnjavaju riječi reisu-l-uleme Husein-ef. Kavazovića: *"Pozicija najvišeg vjerskog autoriteta u Zajednici potvrđena je menšurom, a predstavlja šerijatsku silsilu i simbolizira duhovnu vezu sa Muhamedom, a.s. Vjerski autoritet u Zajednici izražava se i činjenicom da muftije imenuje reisu-l-ulema, a potvrđuje Sabor, te da glavne imame, imame, hatibe i muderrise vjerskih predmeta na islamskim učilištima imenuje i dodjeljuje im muraselu isključivo reisu-l-ulema. Na ovaj način je vertikalna vjerskog autoriteta jasno postavljena i odgovornost precizno naglašena. Istovremeno, opasnost od autoritarnosti je otklonjena instrumentom potvrđivanja muftija koju ima Sabor IZ u BiH. Na drugoj strani, vertikalna ovlaštenog vjerskog autoriteta će onemogućiti samoproглаšenje bilo koga izvan navedene vertikale i preventirati moguće nedoumice i nesporazume u Zajednici ili prema njoj."*

Usvajanjem amandmana svi niži organi Islamske zajednice obavezni su da usklade svoja normativna akta sa Ustavom IZ u BiH. Što se tiče Islamske zajednice u dijaspori, Sabor Islamske zajednice će, na osnovu Ustava, donijeti posebna pravila po kojima će ona biti organizirana. Ova pravila već su jednom bila na javnoj raspravi u našim džematima, međutim, kako su usvojeni amandmani tretirali i neka pitanja iz ovih pravila, sigurno će doći do određenih promijena. Zbog toga pozivam sve pripadnike i članove Islamske zajednice da se uključe u proces pripreme spomenutih pravila, jer će ova pravila bitno odrediti i sadržaj budućeg Statuta i naših drugih normativnih akata.

Idriz-ef. Karaman

Prijave za odlazak na hadždž

2014/1435

BIF
Box 8120
200 41 Malmö

Kontakt telefon za dodatne informacije:

070 730 02 46

Prijave za odlazak na hadždž

Obavještavamo zainteresovane kandidate za hadždž da Islamska zajednica Bošnjaka u Švedskoj i ove godine organizira odlazak na hadždž. Trenutno se pregovara sa ovlaštenim agencijama i čim se postigne dogovor, zainteresirani će, ako Bog da, biti obaviješteni. Preliminarni odlazak na hadždž je krajem mjeseca septembra, a dužina boravka oko tri sedmice. Formular prijave na hadždž i kopiju pasoša treba dostaviti glavnom imamu najkasnije do 15.05.2014.god. na adresu:

BIF
Box 8120
200 41 Malmö

Napomena: Nakon što Islamska zajednica Bošnjaka u Švedskoj potpiše ugovor sa ovlaštenom agencijom, svi prijavljeni kandidati bit će obaviješteni o cijeni i drugim pojedinostima oko odlaska na hadždž. Očekujemo da neće biti nekih većih promjena u odnosu na prošlu godinu. Napominjemo, također, da je broj mjesta i ove godine ograničen i da prednost imaju oni kandidati koji se prvi prijave. Osim toga, odlukom Ministarstva za hadždž Saudijske Arabije, na hadždž ne mogu putovati hadžije koji su hadždž obavili u posljednjih 5 godina.

Kontakt telefon za dodatne informacije:

070 730 02 46



U Gislavedu održan seminar za imame i Skupština Udruženja ilmijje Islamske zajednice Bošnjaka u Švedskoj

U gradu Gislaved 28. i 29. aprila 2014. godine održan je seminar za imame Islamske zajednice Bošnjaka u Švedskoj. Seminaru su prisustvovali gotovo svi imami, a poseban gost iz Bosne i Hercegovine bio je predsjednik Udruženja ilmijje IZ u BiH Mensur-ef. Pašalić. Na početku seminara Izet-ef. Bešić, sekretar omladinske organizacije „Bemuf“, predstavio je Pravopis bosanskog jezika i projekat distribucije ovog značajnog izdanja, koji „Bemuf“ vodi zajedno sa Izdavačkom kućom „Most“ iz Sarajeva. Projekat je sa oduševljenjem prihvaćen od imama i rukovodstvu IZBUŠ sugerira se aktivno ukuljučenje u ovaj projekat. U nastavku seminara, na temu „Imam i džemat“, govorio je predsjednik Udruženja ilmijje IZ u BiH Mensur-ef. Pašalić. Imami su sa velikom pažnjom pratili ovo izlaganje, koje je bilo potkrijepljeno nizom praktičnih primjera i savjeta iz bogatog dugogodišnjeg imamskog rada Mensur-ef. Pašalića. Glavni imam IZBUŠ Idriz-ef. Karaman govorio je na temu „Status imama u Islamskoj zajednici Bošnjaka u Švedskoj“. U svom izlaganju Idriz-ef. Karaman je iznio statističke podatke o golemim aktivnostima koje imami sprovode u svojim džematima. Posebno je istakao podatak da se mektebska nastava održava na 48 mjesta u Švedskoj, dakle, u prosjeku, dva punkta mektebske nastave na svakog imama. Nažalost, imami najčešće nisu adekvatno nagrađeni za svoj rad. Gotovo nevjerovatno zvuči da samo pet džemata u potpunosti iz vlastitih sredstava finansira angažman svojih imama. Kad je u pitanju visina ličnog dohotka, prosječna plaća naših imama puno je bliža švedskom „minimalcu“ nego prosječnoj plaći u ovoj državi.



Nakon ovih izlaganja i diskusije prisutnih imama predloženi su sljedeći zaključci:

1. Bez obzira na svoj status imami će nastaviti i unaprjeđivati svoje aktivnosti.
2. Potrebno je intezivno raditi na poboljšanju statusa i ugleda imama. U tom smislu, nastojati da džemati potpišu Kolektivne ugovore i standardiziraju ugovore o zaposlenju imama.
3. Reaktivirati Udruženje imama i muallima IZBUŠ i pripojiti ga Udruženju ilmijje BiH.
4. Nakon što su usvojeni amandmani na Ustav IZ u BiH aktivno raditi na usaglašavanju normativnih akata IZBUŠ sa ovim dokumentom.
5. Značajnije se uključiti u aktivnosti omladinske organizacije „Bemuf“.
6. Pomoći aktivistima Građanske koalicije „1. mart“

Nakon završetka radnog dijela seminara prikazan je dokumentarni film „Imami šehidi“. Projekciji ovog izvanrednog filma prisustvovali su i džematlije Džemata domaćina, a skupu se obratio predsjednik Udruženja ilmije IZ u BiH Mensur-ef. Pašalić. Drugi dan seminara održana je Skupština Udruženja imama i muallima IZBUŠ. Jednoglasno je odlučeno da se ovo Udruženje ubuduće zove Udruženje ilmije Islamske zajednice Bošnjaka u Švedskoj i da djeluje kao ogranak matične organizacije u BiH.

Za predsjednika je izabran Nezir-ef. Špiodić, a u Upravni odbor: Almedin-ef. Spahić, Smajo-ef. Šahat, Elvedin-ef. Bešlija i Alen-ef. Delić.

Po običaju, odličan domaćin ovog dvodnevnog skupa bio je Džemat Gislaved.

I.K.



Predsjednik Ilmije u BiH uručuje Monografiju udruženja izabranom predsjedniku Ilmije za Švedsku



Sultanova ahdnama iz Fojnice poklon domaćinima dvodnevnog skupa

Džemat Helsingborg: *Održano večer Kur'ana*

U subotu, 12. aprila 2014. godine, u gradu Helsingborg u Švedskoj održano je Večer Kur'ana. Na ovoj izuzetnoj manifestaciji prisustvovao je veliki broj džematlija iz Helsingborge, ali i drugih gradova Švedske. U ime Džemata domaćina voditelj programa bio je agilni mladi imam Nezir-ef. Špiodić, a u programu su učestvovali imami bošnjačkih džemata u Švedskoj: Benjamin-ef. Dučić, Nesib-ef. Makić, Almedin-ef. Spahić, Elvedin-ef. Bešlija, Adnan-ef. Hodžić i hafiz Jusuf-ef. Horozović. Na kraju programa skupu su se obratili glavni imam Islamske zajednice Bošnjaka u Švedskoj Idriz-ef. Karaman

i poseban gost za ovu priliku iz Bosne i Hercegovine hafiz Alija-ef. Rahman, imam džamije kralja Fahda u Sarajevu. Hafiz Rahman prisutne je počastio i učenjem nekoliko odlomaka iz Kur'ana. Vidno je bilo raspoloženje na licima prisutnih dok su uživali u prelijepim glasovima izvođača. Bilo je i suza, a poseban ugođaj bilo je nadahnuto predavanje hafiza Rahmana, u kojem je govorio o veličini i značaju Kur'ana u našem životima. Nakon programa nastavljeno je druženje u prostorija Džemata, uz obilatu večeru, koju su pripremile vrijedne ruke članica Aktiva žena Džemata. Bilo je ovo večer za nezaborav. Prvo u ovom Džematu, ali, kako reče Nezir-ef., ne i posljednje, jer će ovo, ako Bog da, prerasti u jednu lijepu tradiciju.



I.K.

Džemat Halmstad: *Gostovanje hafiz Alija ef. Rahman*



U nedelju, 13. aprila 2014. god. u džematu Halmstad ugostili smo hafiza Aliju-ef. Rahmana. Program je počeo u 18:00 sati učenjem Kur'ana imama džemata Helsingborg, Nezir-ef. Špiodića, a nakon uvodne riječi domaćina i predstavljanja gosta, obratio se hafiz Alija-ef. Rahman, te ovom prilikom govorio o odgoju djece u Islamu. Ovo je bila jedna od posjećenijih tribina u džematu. Poslije predavanja druženje je nastavljeno u lijepom razgovoru, džematlije su postavljale aktualna i interesantna pitanja iz svakodnevnog života gostu. Nakon klanjanja akšam-namaza u džematu, musafiri su počašćeni večerom koju je spremio aktiv žena iz džemata.

A.S.



Mektebsku nastavu vode imam hfz. Jusuf ef. Horozović i muallima hfz. Merima

Džemat Norkköping: *Mektebska nastava i predavanja*

Mektebska nastava

U septembru 2013. počela je nova mektebska godina u džematu Norrköping. Mekteb se održava u džamiji u Norrköpingu, kao i na dva punkta u dva druga grada (Trosa i Nyköping). Od septembra pa do danas ukupan broj djece u mektebu broji 115 polaznika. U subotnjem terminu mekteb je raspoređen u dvije grupe: prva grupa od 10-12 sati (mlađi uzrast), a druga od 13-15 sati (stariji uzrast). U nedjeljnom terminu mekteb se održava u Trosi (Vagnharad) u terminu od 10-11 sati za prvu grupu i od 11-13 sati za drugu grupu. Od 14-16 sati mekteb se održava u gradu Nyköping. Pored mektebske nastave i predavanja i druženja za žene Islamska zajednica Bošnjaka Norrköping ima veoma bogat vjerski program aktivnosti, od kojih su i redovna sedmična predavanja petkom, Kur'an i sufara za odrasle, komentar hadisa svaki dan nakon podne namaza te klanjanje svih pet dnevnih namaza.

Predavanja i druženje *za žene*



U sklopu ukupnih aktivnosti koja se organiziraju u našem džematu, svakog drugog utorka održava se predavanje za žene. U lijepoj i opuštajućoj atmosferi naše vrijedne džematličke imaju priliku poslušati predavanja iz raznih islamskih oblasti, što obogaćuje njihovo sveukupno znanje. Predavanja drži muallima hfz. Merima Horozović. Zadnje predavanje održano je 15.04.2014., na temu "Kader - Božije određenje u svjetlu Islama." Nakon predavanja izabrana je nova predstavica žena u našem džematu koja je i ujedno i član izvršnog odbora. Nova predstavica žena je Adisa Radovac. M.M.

Bosanski kulturni centar- *Västra Götaland*

U periodu od 18-21. aprila ove godine održane su veoma interesantne aktivnosti u okviru BKC (Bosanskog kulturnog centra), koji djeluje na području Västra Götaland regije i okuplja pet naših džemata (Borås, Göteborg, Skövde, Surte i Trollhättan). Gost ovih aktivnosti bio je profesor teologije i psihologije Edin Tule iz Sarajeva. Aktivnosti su otpočele u džematu Göteborg, gdje je u petak, 18. aprila, održano predavanje i druženje sa džematlijama. Sutradan je druženje upriličeno u džematu Borås, a istog dana predavanje je održano i u Trollhättanu, gdje je ujedno obilježeno i 17 godina postojanja ovoga džemata. 20. aprila zanimljive aktivnosti organizirane su u džematu Skövde. Prvo je u prostorijama Skövde kulturhus održan seminar, a nakon toga u Areni Skövde, prof. Tule je, zajedno sa jednim brojem omladinaca i omladinki, odigrao jednosatnu bowling partiju. Druženje sa omladinom nastavljeno je sve do iza akšam namaza u prostorijama džemata. Sve ove lijepe aktivnosti zaokružene su 21. aprila, kada je džemat Borås ugostio džematlije iz svih spomenutih džemata na zajedničkim proljetnim

susretima. Program je počeo podne namazom. Usljedio je ručak za sve prisutne, a onda smo se još jednom mogli uvjeriti u vještinu i znanje koje posjeduje prof. Edin Tule. U svom završnom obraćanju uključio je sve prisutne i na jako zanimljiv način održavao pažnju i uspostavio interakciju sa svim prisutnim u sali. Profesor je kroz jednu veoma zanimljivu radionicu objasnio redoslijed Kur'anskih sura i podučio nas načinima kako da im pristupamo i kako da memorišemo njihove nazive. Na kraju je održano kraće druženje samo sa omladinom, na kom je prof. Tule podijelio još puno korisnih savjeta. Želimo se zahvaliti svim našim džematima i džematlijama koji su uzeli učešće i svojim prisustvom podržali naše aktivnosti. Dovimo Gospodaru da nas sve obilato nagradi.

Do sljedećih susreta.

Rukovodstvo BKC-a

Druženje profesora Edina sa mladima



Džemat Trollhättan

Sedamnaestogodišnjica džemata



Ove godine Islamska zajednica Bošnjaka Trollhättan obilježava 17 godina osnivanja i uspješnog rada. Tim povodom je u subotu 19. aprila u lokalnoj školi KRONAN, između ikindije i akšama, upriličen je vjersko-kulturni program. Na samom početku predsjednik Džemata Dedo Cerić poselamio je prisutne i poželio im dobrodošlicu, a potom su se prisutnima obratili i gosti: glavni imam Idriz ef. Karaman i predstavnik lokalnog NBV-a Lars Malm. Imam Tarik ef. Buza je u okviru

programa održao takmičenje za učenike mekteba. Prisutni su bili oduševljeni znanjem koje su pokazale najmlađe džematlije kao i brzim odgovorima na pitanja koja su često bila veoma teška i za odrasle. Poseban zadovoljstvo je bilo poslušati prigodno obraćanje gosta-predavača uvaženog profesora Edina Tule koji kao i obično govori o praktičnim stvarima kojih smo u biti svjesni ali ih nesvjesno potiskujemo ne želeći priznati sebi da je upravo to ono što život čini sretnim i harmoničnim.



Prisutni su imali priliku uživati u prelijepim ilahijama u izvedbi hora džemata Göteborg „NUR“, kojim dugujemo veliku zahvalnost što su nas počastili svojim prisustvom. Po našem starom dobrom običaju, na kraju su svi prisutni su uživali u poslasticama koje su za ovu priliku pripremile naše vrijedne džematlije i džematlije. Upućujemo svima jedno veliko hvala i molimo Allah, dž.š., da im podari svaki hajr.

J.D.

Od pojedinca do institucije

Jedan običan dan, kojeg sam planirao provesti u Štokholmu u društvu Alen-ef. Delića, imama džemata Malmö i Almedin-ef. Spahića imama džemata Halmstad, pretvorio se u jednu veliku poruku i životno iskustvo. Kako kaže naš Poslanik s.a.v.s.: *"Vjernici su poput stubova jedne građevine, jedan drugog podupiru"*.

Došli smo rano ujutro, napravili kraći obilazak starog dijela Štokholma, uz ugodan razgovor i laganu šetnju razmijenili iskustva stečena u radu pri našim zajednicama. U toku tog lijepog i korisnog muhabeta i ugodne šetnje zvuči telefon i usljeđuje poziv za posjetu i obilazak parlamenta u Kraljevini Švedskoj. Predsjednik džemata Malmö, Montaser Eneim je ove godine član parlamenta. Palestinac, oženjen Banjalučankom, jednostavno se izjašnjava kao Bošnjak. Naravno, prihvatamo poziv i idemo u obilazak parlamenta. Lijep prijem od samog ulaza, na svim mjestima vesela nasmijana lica, iskazuje se dobrodošlica i obilazimo mjesto u kojem se odlučuju sva bitna pitanja za život švedskih državljana, a među njima i 70 hiljada Bošnjaka. Naš domaćin nas je upoznao o načinu rada i života švedskih parlamentaraca. Jedna od tema koje su slijedile kako kaže naš domaćin bila je i zabrana nošenja mahrame djevojčicama ispod 15 godina, što naravno nije usvojeno. Također jedan od projekata je i poslovna saradnja i povezivanje bosanskih firmi putem ambasada sa firmama u Švedskoj. A ja se ponovo sjetih hadisa sa početka ovog teksta i onog razgovora o našim džematima. Koliko pridajemo važnost problemima zbog nekog nepromišljenog gesta pojedinca i tako ih izdižemo iznad interesa džemata, te na taj način se postavljamo suprotno hadisu našeg Resulullaha, umjesto da se okrenemo ovim pozitivnim primjerima naših uspješnih pojedinaca, da ih podržimo, da uvijek budu u vrhu i da se bore na sve načine za interese naših Bošnjaka i za interese muslimana generalno. Da za nas ne odlučuju neki drugi bez da imamo ijed-

nog čovjeka koji je u toku zbivanja i koji može da nas obavijesti ako bi bilo nešto što je protivno našoj lijepoj vjeri, dini islamu. Kada bi svoju energiju, koju trošimo na rješavanje problema, mi renje muslimana I kukanje bez ideje usmjerili u pravcu hadisa našeg Poslanika, uvijek bi bili na vrhu i islam bi bio kao u zlatno doba, u vrijeme kada su međuljudski odnosi bili iskreno bratski i kada nisi mogao naći kome sadaku da udijeliš. Počnimo od sebe, popravimo stanje zajednice tako sto ćemo sebe izgraditi znanjem i moralom. Ukoliko to uspijemo i budemo imali mnogo ovakvih pojedinaca, sigurno ćemo imati i jaku Zajednicu, odnosno institucije. Kako vjerske tako i državne.

Nermin-ef. Babić
Glavni imam IZ-e Bošnjaka u Danskoj



SUSRET 2014

Öland



6-8 Juni

Bemuf

MUSLIMANSKI OMLADINSKI SAVEZ ŠVEDSKE (BEMUF) I OVE GODINE ORGANIZUJE LJETNI SUSRET ZA SVU OMLADINU UZRASTA OD 13 DO 27 GODINA. OVOGODIŠNJI OMLADINSKI SUSRET, AKO BOG DA, BIT ĆE ODRŽAN OD 6. DO 8. JUNA U ÖLANDU. TRODNEVNO DRUŽENJE BIT ĆE ISPUNJENO RAZLIČITIM ZABAVNIM, EDUKATIVNIM I SPORTSKIM SADRŽAJIMA, U KOJIMA ĆE, SIGURNO, MOĆI DA UŽIVAJU SVI POSJETITELJI OVOG SUSRETA. PRIJAVITI SE MOŽETE NAJKASNIJE DO 1. JUNA, A SVOJE PRIJAVE ILI EVENTUALNA DRUGA PITANJA OKO SUSRETA MOŽETE DOSTAVITI EMINI ČUKUR NA MAIL: EMINA.CUKUR@BEMUF.ORG, ILI NA BROJ TELEFONA: 070-407 3441.

SRDAČNO POZIVAMO SVU NAŠU OMLADINU DA BUDE DIO OVOG DRUŽENJA U KOJEM ĆEMO IMATI PRILIKU DA SE MEĐUSOBNO VIŠE UPOZNA MO, STEKNEMO NOVE PRIJATELJE, NAUČIMO NEŠTO NOVO I NA TAJ NAČIN, SVOJIM DOLASKOM, DOPRINESEMO DA OVAJ SUSRET, AKO BOG DA, OSTANE UREZAN U NAŠEM SJEĆANJU PO NAJLJEPŠIM USPOMENAMA.